

ጳጳርሳ ፃፊዳ ኮይር ኪታ ጊዳ ቆፋ

ሃዋሬ ጳጳርሳ ፃፊዳ ኮይር ኪታዛ ጊዳን “ፆሳስ ደሬቲዳ ዳሬ” ጌቲቲ ፃይጌቲዛይታሰኔ ፑዳሃ ባጋራ ቁሪ ኢሲያ ዳሬን ላሌቲ ዲዛ አማኒዛይታሳ፡ ሄ ኪታሰ ዋና ቆፋይ አማኖ ጌዳን ዳር ሜቶይኔ ጎዳቲል ኢሰታ ቦላ ጋኪዳይታ ሚንጮላናሲኔ ዳንጮላናሲኮ። ፃፊዚ ሄሳሉ ኦሊዳይ ዩሱሳ ሃይቆ ጊሽ፣ ሃይቆፔ ዳንላ ጊሺኔ ኢዚ ናምዓንሉ ሃ ሲሚ ያና ዩሳ ሂዳታ ቆንጨሲዛ ዩሱስ ኪርሰቶሳ ሚሺራቸ ቃላ ናባቢዛይታ ቆፊሳናሳ። ዩሱስ ኪርሰቶሲ ካሴ ዳዩዳ ዲሳ ለሚሶ ማላ ፃሊዲ ኢሰታካ ሜቶ ጌንጨ አላናሰ ቤሲዛይሳ ቆፊሴስ። ሄይታራ ወርሲ ጋሊዲ ሜቶይ ኢሰታ አማኖ ሚኖቲል ፓጨዛይሳኔ “ዩሱስ ኪርሰቶሲ ቆንጨዛ ጋላስ” ኢሰቲ ባስ ቤሲዛ ዋጋ ኤካናይሳ ኢሰታ ቆፊሴስ።

ፃፊዚ ኢሰቲ ሜቶ ዳንዲያና ማላ ኢሰታ ሚንጮላፊካ ቦላራ ሄሳ ናባቢዛይቲ ኪርሰቶሳ ካሊዛይቲ ዳዓናሰ ቤሲዛ ዲሰ ዳና ማላ ቆፊሴስ።

- ሃ ማፃፋይ ኦይኪዳ ኩሜላ ቆፋ
- ጌሎሶ 1:1-2
- ፆሲ አሺዛዳ ጊዲዳይሳ ኤሪሶ 1:3-12
- ፆሳስ ዲማቲ ዳና ማላ ኢሜቲዳ ዞሬ 1:13-2:10
- ሜቶ ዋዳ አማኒዛይታ አላፊቲል 2:11-4:19
- አማኒዛይታ አሺኬቲልኔ ኢሰታ ኦሶ 5:1-11
- ኩሻ ቆፋ 5:12-14

1 ዩሱስ ኪርሰቶሳ ሃዋሬ ጊዲዳ ጳጳርሳ፣ አሳ ቢታን ቤቲን ዲዛይታሰ ጳንፆሳን፣ ጋላቲያን፣ ቃጳደቂያን፣ ኢሲያኒኔ ቢቲኒያ ቢታን ላሌቲ ዲዛ አንቲስ። 2 አዋይ ፆሲ ካሴ አንቲና ኤሪዳ ማላ ደሬቲዳይታሰ፣ ዩሱስ ኪርሰቶሳስ አዛዜታናሲኔ አንቲ ኢዛ ሱሳን አራጨቲዲ ጌያና ማላ ዓሎ አያናን ዲማቲዳ አንቲስ ኪያቲልኔ ሳርቲል ዳር።

ጌታ ሂዳታ
3 ዩሱስ ኪርሰቶሲ ሃይቆፔ ዳንዲዳ ጊሽ ኑስ ዳዖ ጊዲዳ ሂዳታ አሚዳይሲ ባ ጌታ ማርቲላን ኑና ባስ ኦራላ ናይታ ሂሰቲዳ

ኑ ጎዳ ዩሱስ ኪርስቶስ አዋይ ፆሲ ጋላቴቶ። 4 ኢዚ ጳዮንታ፡ ሞሬቶንታኔ ጩጎንታ ላታሶ ኢንቴሰ ሳሎን ጊሊሲ ዋሊዳሰ። 5 ኢንቴካ ወርሴላ ጋላሳን ቡሮ ቆንጫና ኣቶቴላሰ ኣማኖ ጌደን ፆሳ ዋልቃን ናጌቲዳታ።

6 ሃዒ ጉላ ዋዴሰ ዲማ ዲማ ፓጩቲ ኢንቴና ዋይሲኮካ ኢንቴ ሄሳን ኡፋዬቲቴ። 7 ሄሲ ሄ ፓጩዚ ኢንቴ ቦላ ጋኪዛይ ኢንቴ ኣማኖዚ ቱሙ ጊዲዲይሳ ቆንጫሳናሳ። ጳያና ዋርቃይካ ታማን ፓጩቴሰ። ዋርቃፌ ኣጲ ቦንቾ ጊዲዲ ኢንቴ ኣማኖይካ ሄሳሉ ፓጩታናሰ ቤሴሰ። ሄሲ ሄ ፓጩቲዳ ኢንቴ ኣማኖይ ዩሱስ ኪርስቶሲ ቆንጫዛ ጋላሰ ጋላታሰ። ቦንቾሲኔ ሳባሰ ኢንቴና ጋላና። 8 ኢንቴ ዩሱስ ኪርስቶስ ኣይፌራ ቤዮንታ ኣጊኮካ ኢንቴ ኢዛ ደሴታ፤ ሃዒካ ኢንቴ ኢዛ ቤዮንታ ኣጊኮካ ኢዛ ኣማኔታ፤ ጮ ቃላን ቆንጫሳና ዲንዳዮንታ ጊታ ቦንቾ ኡፋይሰ ኢንቴ ኡፋዬቲታ። 9 ኢንቴ ናጊዛ ኢንቴ ሹምፖይሰ ኣቶቴላ ኢንቴ ኣማኖን ዳሚዳታ።

10 ሄ ኣቶቴላዛ ጊሽ ኢንቴሰ ኢሜታና ኪያቴላሰ ካሴ ናቤቲ ሎዒላ ዋዘናፔ ፒልጊ ያሊዳ። 11 ካሴ ኢሰታን ዲዛ ኪርስቶስ ኣያናይ ፆሳፌ ቲዩቲዲይሳ ቦላ ጋካና ዋዩዛኔ ሄ ዋዩዛፔ ጉዩ ኢዚ ዳማና ቦንቾዛ ጊሽ ካሴ ባሰ ዋሊዳሰ። ኢሰቲ ቃሰ ሄሲ ዉሪካ ኣይዳ ዋኒ ሃናናኮኔ ዩሺ ቆፒዳ። 12 ሄ ካሴ ናቤቲ ኢንቴሰ ኦሊዲ ኣቲን ኢሰቲ ባሰ ኦሎንታይሲ ኢሰታሰ ቆንጫን ኤሬቲዳሰ። ኢሰቲ ኢንቴሰ ኦሊዲይ ቦላ ሳሎፔ ኪቴቲዳ ያሎ ኣያና ባጋራ ሃዒ ኢንቴሰ ሚሺራቾ ቃላ ዮቲዳ ኣሳቲ ኢንቴሰ ዮቲዲይሳ ቆንጫሳናሳ። ሄሳ ኔ ቃላ ኪታንቻቲካ ቤያናሰ ኣሞቲዳ።

ፆሳሰ ዲማቲ ዲሰ

13 ሄሳ ጊሽ ኢንቴ ኢንቴ ዋዘና ሱሪሲዲ ኦሶሰ ጊቤቲቴ። ዋጋራ ዳዒቴ። ዩሱስ ኪርስቶሲ ቆንጫዛ ዋዴ ኢንቴ ኢዛ ኪያቴላ ዳማናሰ ኢንቴሰ ኩሜላ ሂደታይ ዳዖ። 14 ኢንቴ ኣዛዜቲዛ ናይታ ጊዲዲ ኤርንታ ዲሼ ኢንቴ ካሴ ኢዛን ዲዛ ኢታ ቆፋ ካሎፍቴ። 15 ኢንቴና ያይጊዳ ፆሳይ ዲማ ጊዲዲ ማላ ኢንቴካ ኢንቴ ዲሳን ኡባን ዲማቲቴ። 16 ጋሶይካ “ታኒ ጌሽ ጊዲዲ ጊሽ ኢንቴካ ጌሽ ጊዲቴ” ጌቲቲ ጌሻ ማፃፋን ካሴ ዓፌቲዳሰ። *

17 ኦናካ ዲማ ሻኪ ማደንታ ኢሳ ኢሳሰ ኢዛዳ ኦሶ ማላ ፒርዲዛ ፆሳ “ኢዚ ኑ ኣዋ” ጊዲ ኢንቴ ያይጊኮ ሃይሳ ኣላሚዛን ኢንቴ ኢማሌኔ ቤቴ ኣሰ ጊዲዲ ዲዛ ዋዴ ኡባን ኢዛሰ ባቢቴ። 18 ኢንቴ ካሴ ኢንቴ ኣዋታፔ ላቲዳ ጮ ማላ ሃዲ ዲሳፌ

* 1:16 ለዌ 11:44-45፤ 19:2

ዎዘቲዳይ ጳዪዛ ቢራን ዎይኮ ዎርቃን ጊደንታይሳ ኢንቴ ኤሬታ።
 19 ጊደ ኣቲን ኢንቴ ዎዘቲዳይ ኢታይኔ ዎሶይ ኢዛ ቦላ ባይንዳ
 ጌሻ ደርሳ ማላ ጊዲዳ ኪርሰቶሳ ቦንቾ ሱፋና። 20 ኢዚ
 ኤሬቲዳይ ሃይሲ ኣላሜዚ ሜዴታናፕ ካሴ ጊዲሺን ሃሲ ቃሰ
 ዉርሴላ ዎዴን ኢንቴሰ ቆንጨዴሰ። 21 ኢንቴሰ ኣማኖይኔ ኢንቴ
 ሂደታይ ያሳን ጊዳና ማላ ዩሱሰ ኪርሰቶሳ ባጋራ ሄ ኢዛ ሃይቆፕ
 ዴንሲዲ ኢዛሰ ቦንቾ ኢሚዳ ያሳን ኢንቴ ኣማኔቴታ።

22 ኢንቴ ኣማኒዛይታ ሱሬ ዎዘናፕ ሲቃና ማላ ቱማሰ
 ኣዛዘቴላን ኢንቴ ኢንቴ ኣሳቴላ ጌሺዴታ። ሄሳ ጊሽ ኢንቴ ኢንቴ
 ጊደን ኢሶይ ኢሳራ ሎዔሊ ሲቁቲቴ። * 23 ኢንቴ ናምዓንሉ
 ዩሌቲዳይ ሜርናሰ ሚኒ ዲዛ ጳዮንታ ዴዎ ያሳ ቃላን ጳዮንታ
 ዜሬላፌ ኣቲን ጳዪዛ ዜሬላፌ ጊዳና። 24 ጌሻ ማፃፋይ ጊዛ ማላ
 “ኣሾ ማይዒዳይ ዉሪካ ማታ ማላ፤

ኢዛ ቦንቾይካ ዉሪካ ዎራ ጨሻ ማላ፤
 ማታይካ ሜሌሰ፤ ጨሻይካ ቆኬሰ።
 25 ጎዳ ቃላይ ጊዲኮ ሜርናሰ ኤቂ ዴሰ።”
 ኢንቴሰ ሳባኬቲዳ ሚሺራቾ ቃላይካ ሄሳ።

2

ዴዎ ሹቲኔ ጌሻ ዴሬ

1 ሄሳ ጊሽ ኢታቴላ ዉርሲ፣ ባሌላ ዉርሲ፣ ቆዴፕ ቆሞን ሃኖ፣
 ቃናቴቴላ ኣይኮ ቆሞ ዘጊርሰ ኢንቴፌ ዲጊቴ። 2 ሃሲ ዩሌቲዳ ጉላ
 ናይቲ ማላ ኣሞቲዛይሳ ማላ ኢንቴካ ኣታናሰ፣ ኢዛን ዲጨ ዲጨ
 ባናሰ ጌሺ ጊዲዳ ኣያና ቲሚርቴ ላሞቲቴ። 3 ኢንቴ ላሞታናሰ
 ቤሲዛይ ጎዳይ ኪያ ጊዲዳይሳ ሻኪ ኤርኮኮ! *

4 ሄሳ ጊሽ ጌዴ ዴዎ ሹቲ ጊዲዳ ዩሱሳኮ ሸቂቴ። ሄ ሹታይ
 ኣሳይ ሌቂ ኣጊዳይሳ ሺን ያሳ ኣቻን ቃሰ ደሬቲዳይሳኔ ቦንቾ
 ዎጋይ ዲዛይሳ። 5 ኢንቴ ጌዴ ጎዳ ዩሱሳኮ ሸቃናይካ ዴዎ
 ሹታ ማላ ዓሎ ኣያና ዲሳሶ ጊዳና ማላ ኦሴቴታ፤ ሄሳሳካ ኢንቴ
 ዩሱሰ ኪርሰቶሳ ባጋራ ኡፋይሲዛ ኣያና ያርሾ ያሳሰ ሸሻናሰ
 ጌሻ ቁሴታ ጊዳንዴታ። 6 ጌሻ ማፃፋን “ሄኮ ደሬቲዳ ቦንቾ
 ጊዲዳ ኬላሰ ማዜኔን ኡቲዛ ሹቲ ታኒ ዒዮኔን ዎላና። ኢዛን
 ኣማኒዛይይ ዩላቴና” ጊዛ ቃላይ ያፌቲ ኡቲዴሰ። * 7 ሄሳ

* 1:22 ሱሬ ዎዘናፕ ኢሲ ኢሲ ጌኣሻ ማፃፋቲ ኩሜላ ዎዘናፕ ጌቴሰ። * 2:3
 ማዛ 34:8 * 2:6 ኢሳ 28:16

ጊሽ ኢንቴስ አማኒዛይታስ ሄ ሹቻይ ቦንቾ ሹቹኮ ሺን ሂንኮ ኢዛን አማኖንታይታስ ቃስ “ሹቻን ከጊዛ ከፋ ሂላቲ ሌቂ ዎራ ዩጊዳይስ ኢዚ ከፋ ማዜኔስ ሁዔ ጊዲዳስ”* 8 ቃሴካ “ሂኮ ኣሴ ቆጶዚ ሹቻይ ሃይሲቶ! ኣሳ ቆጶ ኩንዲሲዛ ዛላ ሹቻይ ሃይሳኮ” ጌስ። ኢሰቲ ቃላ አማኖንታ ኢዲዳ ጊሽ ቆጶቴቴስ። ካሴካ ኢሰቲ ሄሳስ ዲዛይታ። *

9 ኢንቴ ቃስ ቆማፔ ጌዴ ዳር ማላሊሲዛ ኢዛ ፖጎኮ ዪይጊዳ ማላሊሲዛ ያሳ ኦቶ አዎጃናስ ደሬቲዳ ዩሌቴፎ። ካዎ ቄሴታ፡ ያሲ ኢንቴና ባስ ሂሰቲዳ ኢንቴ ዲማ ዴሬታ። * 10 ኢንቴ ካሴ ያሳ ዴሬ ጊዳኬታ ሺን ሃዒ ጊዲኮ ኢንቴ ያሳ ዴሬ። ኢንቴ ካሴ ኢንቴስ ያሴ ቃጴቶንታ ዴሬኮ ሺን ሃዒ ጊዲኮ ቃጴቲዳስ።*

ያሳ ኦሳንቻታ

11 ታ ሲቆቶ! ኢንቴ ሃይሳ ኣላሚዛ ቦላ ኢማጮኔ ቤቴ ኣስ ጊዲዳ ጊሽ ሹምፖራ ኦሌቲዛ ኣሾ ኣሞቴፋታፔ ሃካና ማላ ታ ኢንቴና ሃዳራ ጋይስ። 12 ኦኔ ኤሪዛይ “ኢንቴና ኢሰቲ ኢታ ኦፊቴስ” ጊዲ ኣሳይ ዘጊሪኮካ ያሲ ኦና ቤያናስ ዪዛ ጋላስ ኣይዛቤቲ ኢንቴ ኦሶይ ሎጎ ጊዲዳይሳ ቤዒዲ ያሴ ጋላታና ማላ ኢንቴ ኢስታራ ዲዛ ዎዴ ኢንቴ ኣማሌይ ሎጎ ጊድ።

13 ኢንቴ ጎዳ ዩሱሳ ጊሽ ጊዲ ዴሬ ኣይሲዛይታስ ኣዛዘቲቴ። ካዎይ ቃስ ኡባሬ ቦላራ ዲዛ ጊሽ ካዎሲካ ኣዛዘቲቴ። 14 ዴሬ ኣይሲዛይታስ ኣዛዘቲቴ። ኢሰቲ ኢታ ኦፊዛይታ ቃጎያናሲኔ ሎጎ ኦፊዛይታ ጋላታናስ ካዎፔ ከቴቲዛይታ። 15 ኢንቴ ሎጎ ኦሶን ሃንኮ ኤራይ ባይንዳ ኤያቴፋን ሃሳዪዛይታ ጮፀ ሂሰታና ማላ ሄሲካ ያሳ ሹኔ። 16 ኢንቴ ያሳስ ኦፊዛ ኣሳታ ማላ ጊዲዲ ሂርጋይ ባይንዳ ዴዒቴ ኣቲን ኢንቴ ኢንቴ ሹኔ ማላ ዲዛ ዲሳ ኢታቴፋ ካሚዛ ሚሽ ሂሰቶፍቴ። 17 ኣስ ኡባካ ቦንቹቴ። አማኒዛይታ ሲቂቴ። ያሳስ ባቢቴ። ካዎ ቦንቹቴ።

ከርሰቶሳ ዋይቴፋ ሌሚሶ

18 ኢንቴኖ ኣሳስ ኦፊ ኣቂዛይቶ! ኢንቴና ኦሲሲዛ ጎዳታስ ቦንቾን ኣዛዘቲቴ። ኢንቴ ኣዛዘታናይ ሎጎታሲኔ ኣሽኬታስ ያላላ ጊድንታ ሃንኮ ኢታታሳራኮ! 19 ኣሲ ጋላቴቲዛይ ጮ ሚላ ቆሄቲሹ፤ ሄሲካ ያሳ ጊሽ ጊዲ ዳንዲያና። 20 ኢንቴ ኢታ ኦፊዳ

* 2:7 ማዛ 118:22 * 2:8 ኣሳ 8:14-15 * 2:9 ከሳ 19:5-6፤ ኣሳ 43:20-21፤ ዛሬ 4:20፤ 7:6፤ 14:2፤ ቲቶ 2:14፤ ኣሳ 9:2 * 2:10 ሆሴ 2:23

ጊሽ ቃፃዬተሼ ዳንዳዪኮ ኢንቴሰ ኣዛ ጋላታይ ዳኔ? ኢንቴ ሎዖ ኦሊዲ ዋዩ ኤኪሼ ዳንዳዪኮ ኢንቴ ያሳፊ ጋላታ ኤካንዴታ።
 21 ኢንቴ ዔይጌቲዳይካ ሃሳሳ። ኢንቴ ኢዛ ለሚሶ ካላና ማላ ከርሰቶሲ ኢንቴ ጊሽ ዋዩ ኤኪዲ ኢንቴሰ ለሚሶ ገዲዴሰ።
 22 ኢዚ ኣይኮ ናጋራካ ኦሊቤና። ኢዛ ዱናን ጌኔይ ቤቲቤና። *
 23 ኣሳይ ኢዛ ጫዩሺን ኢዚ ዛሪ ጫዩቤና። ዋዩተሼ ባና ቱሙ ፒርዲዛ ጎዳሰ ሃዳራ ኣሉ ኢሚዴሰ ኣቲን ሃሎ ኬሳና ማንዲቤና።
 * 24 ኦኒ ናጋራፔ ሻካቲዲ ዒሎቴላን ዳና ማላ ኢዚ ባርካ ባ ኣሾን ኦ ናጋራ ማሰቃሌ ቦላ ቶኪዴሰ። ኢንቴ ኢዛ ማዲንላን ፓዒዴታ።
 * 25 ኢንቴ ጳዩዳ ድርሳታ ማላ ጮ ማላ ቱይሩ ቱይሪዴታ ሺን ሃዒ ቃሰ ኢንቴ ሹምፖ ሄሚዛይሳኮኔ ናገዛይሳኮ ሲሚዴታ።

3

ኣዚና ጊሺኔ ማቺ ጊሽ

1 ሃሳሶካ ማቺቶ! ኢንቴ ኢንቴ ኣዚናታሰ ኣዛዘቲቱ። ሃሳሶ ኢሲ ኢሲ ኣዚናቲ ያሳ ቃላ ኣማኖንታይታ ገዲኮካ ጮ ማላ ባ ማቺታ ሎዔቴላን ፃላላ ሲሞንታ ኣጌቴና። * 2 ኢሰቲ ሲማና ዳንዳዩዛይ ኢንቴ ጌሻቴላኔ ኢንቴ ኣሴ ቦንቺዛ ዱሰ ዲዛይሳ ቤዩዲኮ። 3 ኢንቴ ሎዔቴላ ጮ ማላ ሁዔ ዳላኒኔ ዋርቃን ጌፀቴላን፣ ኣልዖ ማዮ ማይዖን፣ ጮ ማላ ኣይፊን ቤቲዛ ጌፀን ገደፖ። * 4 ኢንቴ ሎዖይ ያሳ ሲንላን ዋጋራ ዲዛ ኬሂ ቦንቺቲዳዚኔ ጳዮንታ ጌፀን፣ ኣሽኬቴላን፣ ኣዳቴላኒኔ ኣያናን ጌፀቲዳ ዋዘና ጋርሳን ቆቴቲ ዲዛ ገደ ዋዘና ሎዔቴላ ገደ። 5 ቤኒ ዋዴ ባ ሂደታ ያሳን ኦሊዳ ጌሻ ማጫሳቲ ጌፀቲዳይ ሃይሳ ማላና። ኢሰቲ ባ ኣዚናታሰ ኣዛዘቲዳ። 6 ኢሰቲ ኣዛዘቲዳይካ ሳራይ ኣብራሃሜ “ታ ጎደ!” ጋዳ ኣዛዘቲዳይሳ ማላ። ኢንቴካ ሎዖ ሚሽ ኦሊኮኔ ኢሲ ኢታ ሚሽ ኢንቴና ዳጋንሎንታ ኣገኮ ኢንቴ ሳራ ናይታ።
 7 ኣዚናቶ! ኢንቴ ኢንቴ ማቺታራ ኣከካን ኢሲፊ ዴዒቲ። ኢሰቲ ኢንቴፊ ዳቡራንቻ ሚዴቴላ ገዲዳ ጊሺኔ ቃሴካ ያሰ ጮ ማላ ከዖቴላን ኣሚዛ ዴዖ ኢሰቲ ኢንቴናራ ኢሲፊ ላታናይሳ ጊሽ ኢንቴ ኢሰታ ቦንቺቲ። ኢንቴ ሄይሳሶ ኦሊኮ ኢንቴ ዋሳ ቆጶዲዛ ሚሽ ዴና። *

* 2:22 ኢሳ 53:9 * 2:23 ኢሳ 53:7 * 2:24 ኢሳ 53:5 * 3:1 ኤፊ 5:22፤ ቆላ 3:18 * 3:3 1ፂሞ 2:9 * 3:7 ኤፊ 5:25፤ ቆላ 3:19

ሎዎ ኦሌዛ ጊሽ ዋዬ ቤዎ

8 ሄሳፌ አሳ ባጋራ ቃስ እንቴ ኢሶይ አሳራ ሲቆን ዲቴ። ሃራ አሳ ቦላ ጋኪዛ ሜቶ እንቴ ሜቶ ማላ ያሊቴ። እንቴ እንቴ ጋርሳን አሻንታ ማላ ሲቁቴቴ። አሺኬታኔ ኪያታ ጊዲቴ። 9 አንጂቴ አቴን ኢስታስ ኢታ ጫሻስ ጫሽ ዛርፕቴ። እንቴ ያይጌቴዲይ ሄሳዶ ኦሌዲ አንጅ ላታናሳ። 10 ጌሻ ማፃፋይ ጊዛ ማላ “ዳዎን ዳና ኮዩዛይኔ ሎዎ ጋላሳታ ቤያናስ ኮዩዛ አሲ ባ ዲናፕ ኢታ ሃሳዮንታ ማላኔ ባ ሜቴርሻቲካ ጌኔ ሃሳዮንታ ማላ ናጌቶ። 11 ኢታ ዮዎፔ ሃኮ፣ ሎዎ ኦሎ፤ ሳርቴላ ኮዮኔ ካሎ። 12 ጎዳ አይፊቴ ያሎታ ባጋ ያሌቴስ። ኢዛ ሃይፊቴካ ኢስታ ዋሳ ሲያናስ ደያ ዳቴስ። ሂንኮ ኢታ ኦሌዛይታ ቃስ ጎዳይ ባ ሃንቆ አይፊሶ ቤሳና” ጊዳስ።

13 እንቴ ሎዎ ኦላናስ ሚኔቲኮ እንቴ ቦላ ኢታ ሚሽ ጋላናይ ኦኔ? 14 እንቴ ሎዎ ኦሌዲ ጊሽ ዋዬ ቤዳኮካ እንቴ አንጅ ኤካና። አሳይ እንቴ ቦላ ኢታ ኦላናስ ማንዴቲዛይሳስ ባቦፊቴኔ ዳር ቆፖፍቴ። * 15 ጎዳ ኪርሰቶሳ እንቴ ዋዝናን ቦንቺቴኔ ኢዛ እንቴ ዳዎስ ጎዳ ሂስቲቴ። እንቴስ ዲዛ ሂደታ ጊሽ እንቴና ኦይቺዛይታስ ኡባስ ዛር አማናስ ኡባ ዋዴ ጊጌቲ ኡቲቴ። 16 እንቴ ኢስታስ አማና ዛርይ ቃስ አሽኬቴላኒኔ ቦንቺን ጊደ። እንቴ ኪርሰቶሳይታ ጊዲዳ ጊሽ እንቴስ ዲዛ ሎዎ አማሌዛ ጊሽ ኢታ ሃሳዩዛ አሳይ ባ ኢታ ሃሳያን ዬላታና ማላ እንቴስ ሎዎ ቆፋይ ዳዎ። 17 ያሳ ሽኔ ጊዲኮ እንቴ ኢታ ኦሶ ኦሌዲ ዋዬታናይሳፊ ሎዎ ኦሶ ኦሌዲ ዋዬቲኮ ሎዎ። 18 ኪርሰቶሲካ ኦና ያሳኮ ሽሻናስ ኢዚ ባ ሁዔስ ያሎኮ ሺን ሃንኮ ያሎ ጊደንታ ኦ ናጋራ ጊሽ ናምዓንጤቶንታ ማላ ኢሲቶ ዋዬቲዲ ሃይቁዳስ። ኢዚ አሾን ሃይቁዳስ ሺን አያናን ቃስ ፓዲዳስ። 19 ሄሳ ሄ አያናን ቃሾ ኬላን ዲዛ ሹምፖታኮ ቢዲ ኢስታስ ሚሺራቾ ቃላ ዮቲዳስ። 20 ሄይቲ ሄን ዋይኔ ኬላን ዲዛ ሹምፖቲ ካሴ ኖሄ ዋዴ ማርካቤዚ ኦሌቲ ጊሺሺን ኢስቲ ሲማና ማላ ያሲ ዳንዳያን ናጊሺን ኦኒ ኔስ አዛዜቶኮ ጊዳይታ። ሄ ማርካቤዛን ጌሊን ሃሌፊ አቲዳይታ ቆዳይ ኦሶፑን ጊዲዳ ጉላ አሳታ ያላላ። * 21 ሄሲ ሄ ሃላይ ሃዒ ቃስ እንቴ ኢዛን አቲዛ ዲንቃቴ ለሚሶ። ሃይሲ ዲንቃቴይ ቂታ ቦላ ጌያናስ ሜጬቴሌ ጊደንታ ጌሻ ቆፋ ኤካናስ ያሳኮ ሺሺዛ ዋሳ። ኢዚ እንቴና አሻናይካ ዬሱስ ኪርሰቶሳ ዳንላ ባጋራ። 22 ኢዚ ፑዴ ሳሎ ቢዲ ሃዒ ያሳ አቻን ዳስ። ኪታንቻቴኔ ጎዳቴሌ ኢስታስ

* 3:14 ማቶ 5:10፤ አሳ 8:12-13 * 3:20 ሜዴ 6:1-7:24

ዲዛይት ዋልቃማታካ ኢዛሰ ሃራቲዳ።

4

ጌሻቴላን ዲሰ

1 ከርሰቶሲ ባ አሾን ዋዬ ኤኪዳ ጊሽ አንቴካ ኦላ ኦሌቲዛ ሚሾ ጊዳዳ አሳ ማላ ሃይሳ ሃ ቆፋን ሚኒዲ ጊጌቲቲ። ባ አሾን ዋዬ ቤዱዳ አሲ ናጋራ ኦሶ አጊዴሰ። 2 ሄሳፌ ጉዬ ባ ዲዛ ዋዬ ኡባን ኢዚ ዳናይ ኢታ አሾ አሞቴሌ ኦሶን ጊዶንታ ዲሾ ያሳ ሼኔ ፖሎና። 3 ሂንኮ ዳሪ አሳቲ ኦሊዛይሳ ማላ አንቴ ጮ ማላ ዬዳ ዲሳን አሾ አሞን፣ ማሶን፣ ኦጌይ ባይንዳ ካሳን፣ ዋጋፔ አሊ ኡዬዲ ዱሩሳኒኔ ሃራሲዛ ኤቃ ጎይኖን ካሴ አንቴ አሊዳ ዋዴዚ አንቴሰ ጊዳና። 4 ሃዲ ቃሰ አንቴ ሃ ዮዎዛን ኢሰታራ ዋጋይ ባይንዳ ቁዳ ቁዳንታ ጊሽ ኢሰቲ ማላሌቴቴሰኔ አንቴና ጫዬቴሰ። 5 ጊዶ አቲን ሃይቁዳይታ ቦላኔ ፓፃ ዲዛይታ ቦላ ፐርዳናሰ ጊጊ ኡቲዳይሳሰ ኢሰቲ ዛር ኢማና። 6 ሃይቁዳይታሳራ ሚሽራቾ ቃላይ ዮቴቲዳይ ሄሳ ጊሻሳ። ሄሳቃካ አይ አሳ ቦላካ ፐርዲዛ ማላ ኢሰታ አሾ ቦላ ፐርዳና። ኢሰታ ሹምፖይ ቃሰ ያሲ ዲዛ ማላ ዴዮን ዴያና።

ያሳ አሞታታ ዋጋራ ጎዔቴላ

7 ሄሳ ጊሽ ዋዴ ወርሴሌ ማቲዴሰ። አንቴ ሚኒ ዋሳናሰ ዳንዳያና ማላ ዋጋራ ዲቴኔ ዎፑ ጊዳ ቆፋይ አንቴሰ ዴዮ። 8 ሲቆይ ዳር ናጋራ ካሚዛ ጊሽ ሃራፔ ቦላራ አንቴ አንቴ ጋርሳን ሎዔሌ ሲቁቲቴ። * 9 ዙዙንላ ባይንዳ ኢሶይ ኢሳ አማላቴላ ሞኪ ኤኪቴ። 10 ዲማ ዲማ ጊዲዳ ያሳ ኪያቴላ አሞታታ አማኔቴላን ኦይኪዲ አንቴፌ ኢሲ ኢሲ አሲ ባሰ አሜቲዳ ያሳ ኪያቴላ አሞታን ሃራ አሰ ማዶ። 11 ታማርሲዛዴይ ያሳ ቃላ ታማርሲዛ ማላ ታማርሶ፤ ሃጋዚዛዴይ ያሲ ኢዛሰ አሚዛ ዋልቃን ሃጋዘ፤ ሄሳ ማላን ያሲ ዬሱሰ ከርሰቶሳ ባጋራ ሃኒዛ ኡባን ጋላቴታና። ቦንቾይኔ ጎዳቴላ ሜርናፔ ሜርና ጋካናሰ ኢዛሰ ጊዶ። አሚን!

ሜቶ ዳንዳዮ

12 ታ ሲቆቶ! አንቴ ታማ ማላ ፓጪዛ ሜቶ ጊዶን ጌሊዛ ዋዴ ሄሳ ማላይ ካሴ ባይንዳ ኦራላ ሚሺ ጋኪዳዝ አንቴሰ ሚሳቲን ማላሌቶፍቴ። 13 ሄሳፌ ቦላራ ከርሰቶሳ ቦንቾይ ቆንጪዛ ዋዴ አንቴ ኬሂ ኡፋዬታና ማላ አንቴ ኢዛራ ኢዛ ዋዴዛ ኤኪዛይታ

* 4:8 ለም 10:12

ጊዲዳ ማላ ኡፋዬተቲ። 14 ኢንቴ ኪርሰቶሳ ሱንጎላ ጊሽ ጫዬቲኮ ቦንቾ ኣያናይ ሄሲካ ያሳ ኣያናይ ኢንቴ ቦላ ሸምፐዛ ጊሽ ኡፋዬተቲ። 15 ኢንቴፌ ኦና ቦላካ ማቶይ ጋኪኮ ሄሳዴይ ሸምፐፕ ዋጂዳ ኣሳ ማላ፡ ካይሶ ማላ፡ ኢታ ኦሊዳ ኣሳ ማላኔ ኣሳ ዮዖ ጊደ ጮ ዋዒ ጌሊዳዴ ማላ ጊደፖ። 16 ኢዚ ኣማኒዛዴ ጊዲዳ ጊሽ ኢዛ ቦላ ጋኪዛ ማቶይ ዲኮ ቃስ ኪርሰቶሳ ሱንጎላን ኢዚ ያሳ ጋላቶ ኣቲን ዬላቶ።

17 ፐርዳይ ደሚታናሰ ዋይይ ማቲዴሰ። ሄ ፐርዳይ ደሚታናይ ኮይር ያሳ ኣሳ ቦላኮ! ሂሰቲን ፐርዳይ ኦናን ደሚኮ ያሳ ሚሺራቾ ቃላስ ኣዛዜቶንታ ኢዲዳ ኣሳ ወርሴሊ ኣይ ጊዳኔ? 18 ጌሻ ማፃፋይ “ዲሎይካ ዋይዲ ኣታናዝ ጊዲኮ፡ ሃንኮ ያሳስ ሳይናንታ ኣሳይኔ ናጋራንቻቲ ዋናንዴቶ?” ጊዛ ማላ። * 19 ሄሳ ጊሽ ያሳ ሼኔ ማላ ዋይቲዛ ኣሳቲ ባናቴላ ወርሲ ኣማኔቲዳ ባና ማጂዳይሳስ ሃዳራ ኢሚዲ ሎዖ ኦሶ ኣላንታ ኣጎፌቶ።

5

ያሳ ኣሳ ኣይሳናሰ ኢሜቲዳ ዋጋ

1 ሄሳ ጊሽ ታካ ኢሰታራ ኢሲፌ ዋሳ ኬላሰ ጨማኔ ኪርሰቶሳ ዋይዛሰ ማርካ ጊዲዳ ታኒ ቃሴካ ቡሮፔ ቆንጫና ቦንቾዛ ጊሽታናሰ ዲዛ ታኒ ኢንቴናራ ዲዛ ዋሳ ኬላ ጨማታ ዘራይሰ። 2 ኢንቴሰ ሃዳራ ኢሜቲዳ ያሳ ወዴ ናጊቴ። ሄ ኢዛ ወዴዛ ዋልቃራ ጊደንታ ያሲ ኮዩዛ ኦጌራ ደሳራ ሄሚቴ። ሚሼሰ ዩቄቴላን ጊደንታ ሃጋዛናሰ ዋዝናፔ ኮሻን ጊደ። * 3 ሄሳላካ ኢንቴ ኣላፌቴላ ጋርሳን ዲዛይታ ዬጂ ሃርን ጊደንታ ወዴዛሰ ሎዖ ለሚሶ ቤሶን ጊደ። 4 ኢንቴ ሄሳላ ኦሊኮ ሃንኮ ዋና ሄሚዛይሲ ቆንጨዛ ዋዴ ኢንቴ ሞሬቶንታ ቦንቾ ኣክሊሌ ኤካና።

5 ሄሳላካ ኢንቴና ናቴላቶ! ኢንቴ ጨማታሰ ኣዛዜቲ። ኢንቴ ወራካ ኣሽኬቴላ ኣፋላ ማላ ማይዲዲ ኢሶይ ኣሳሰ ኦሊቴ። “ያሲ ኦቶራዛይታ ኢዴሰ። ኣሽኬታሰ ቃሴ ባ ኪያቴላ ኢሜሰ” ጌቲቲ ካሴ ጌሻ ማፃፋን ፃፌቲዴሰ። * 6 ሄሳ ጊሽ ያሲ ባ ዋዴን ጶቄ ሂሰታና ማላ ሚኖ ያሳ ኩሼፔ ጋርሳራ ኢንቴና ዘቄ ሂሰቲቴ። * 7 ኢዚ ኢንቴሰ ቆፒዛ ጊሽ ኢንቴና ማቲዛ ቆፋ ወርሲ ኢዛ ቦላ ዬጊቴ።

* 4:18 ለም 11:31 * 5:2 ዮሃ 21:15-17 * 5:5 ለም 3:34 * 5:6 ማቶ 23:12፤ ሉቃ 14:11፤ 18:14

8 ዎጋራ ዳዒቲ! ቤጊቲ! ኢንቴ ሞርኬ ዳቡሎሲ ባሰ ሚታና ሚሽ ኮዪሽ ፃጊዛ ጋሞ ማላ ኢንቴ ዩሾን ሃርቡቁስ። 9 ኣላሚ ኩሚላን ዲዛ ኢንቴ ኢሻቲ ሄሳ ማላ ሜቶ ኤካና ዲዛይሳ ኢንቴ ኤሪዲ ኣማኖን ሚኒ ኤቂዲ ኢዛሪ ኤቁቲቲ። 10 ኢንቴ ጉላ ዎዴሰ ዋዩቲዳይሳፊ ጉዬ ኢንቴና ኪርሰቶሳ ባጋራ ጌዴ ሜርና ቦንቸሰ ፃይጊዳ ኪያቴሐ ኡባሰ ጎዳይ ኢዚ ባርካ ኢንቴና ጋኪዳ ዋዩዛፔ ኢሻና፣ ማዳናኔ ሚንጼላና ቃሴካ ዳዝጊሳና። 11 ቦንቸይኔ ዎልቃይ ሜርናፔ ሜርና ጋካናሰ ኢዛሰ ጊዶ። ኣሚን።

ወርሴላ ሳሮካ

12 ታኒ ኢዛን ኣማኔቲዳ ኢሻ ጋ ቆፒዛ ሲልዎኖሴ ባጋራ ሃይሳ ኪታዛ ቃንሳራ ኢንቴሰ ፃፋዲሰ። ታ ሄሳ ፃፊዳይ ኢንቴና ዞራናሴኔ ሃይሲ ቱሙ ያሳ ኪያቴሐ ጊዲዳይሳ ኢንቴሰ ቆንጨሳናሰ ጋዳ። ሄሳ ጊሽ ኢንቴ ሃይሳን ያሳ ኪያቴላን ሚኒ ኤቁቲ። *

13 ኢንቴ ማላ ዶሬቲዳራ ባቢሎኔን ዲዛ ሚቸ ጊዲዳ ዎሳ ኬላያ ኢንቴሰ ሳሮካ ሸሻዉሰ። ታ ና ማርቆሲካ ኢንቴና ሳሮኬሰ።

* 14 ኣማኖ ሲቆቴላን ኢንቴ ኢሶይ ኢሳ ዬሪ ኤኪዲ ሳሮኬቲቲ። ኢንቴሰ ኪርሰቶሳይታሰ ኡባሰ ሳሮይ ጊዶ።

* 5:12 ሃዎ 15:22፥40 * 5:13 ሃዎ 12:12፥25፤ 13:13፤ 15:37-39፤ ቆላ 4:10፤ ፒል 24

ኑድሳ ጩቆ ማፃፋ ንሞሉ

New Testament in Gamo (ET:gmv:Gamo)

copyright © 2011 Wycliffe Bible Translators, Inc.

Language: Gamo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gamo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 29 Sep 2022 from source
files dated 29 Jan 2022
dffa0cbb-5f77-5875-bf95-f4176677af45